



Komunikadu Imprensa
Tribunál Distritál Dili
04 Agostu 2015

Tribunál ezije indemnizasaun sivil ba kondenadu Antonio Freitas antes konsidera pedidu liberdade kondisionál hosi ministériu públikú

Iha 31 Jullu 2015, Tribunál Distritál Dili, hala’o julgamentu ho ajenda revizaun ba pedidu liberdade kondisionál ba kondenadu Antonio Freitas de Araújo tanba kondenadu kumpri tiha ona metade hosi pena prizaun tinan 5 ne’ebé tribunál aplika ba nia iha tinan 2012.

Mesmu nune’e, antes tribunál konsidera pedidu revizaun ba liberdade kondisionál ne’ebé apresenta hosi ministériu públiku ne’e, tribunál sei kestiona kona-ba kondenadu nia inkomprimentu ba obrigasaun indemnizasaun sivil ba estadu, desde inisíu tama kadeia iha tinan 2012, to’o ohin loron.

JSMP hanoin importante atu asegura katak kondenadu kumpri nia obrigasaun ne’ebé tribunál hatun no ejize kondenadu atu rekoopera hikas prejuizu ne’ebé estadu sofre tanba nia hahalok. Aliende atu hatudu ba públiku katak, estadu nunka tolera korruptor sira maske sira kumpri ona pena prizaun. Ne’e mós atu asegura katak desizaun tribunál nian iha forsa no kredivel.

“Ne’e prátika diak atu hametin ita nia kadru lei penal ne’ebé fo fatin atu halo revizaun ba prezu sira ne’ebé serve ona metade hosi sentensa tribunál atu evita prátika fo indultu ne’ebé dalabarak hamosu konfuzaan no inkonsistencia ho esforsu atu hametin sistema justisa kriminál,” dehan Diretór Interinu JSMP, Casimiro dos Santos.

Iha Artigu 64 Kódigu Penál define katak:

1. Ajente ne’ebé hetan kondenasaun ho pena prizaun efetiva ka sujeisaun ba medida internamentu bele hetan liberdade kondisionál ka liberdade atu prova.
2. Salvu dispozisaun seluk, tenke fó liberdade kondisionál ba kondenadu ne’ebé kumpri tiha ona pena nia da-noon lima.
3. Tenke iha kondenadu nia konsentimentu atu fó liberdade kondisionál ba nia, salvu iha situasaun prevista iha número anteriór.

Iha julgamentu revizaun ba sentensa ne'e, kondenadu Antonio Freitas de Araújo deklara katak, oras ne'e dadaun nia laiha kapasidade atu indemniza hikas osan hirak ne'e. Maibé nia promete katak bainhira sai hosi prezu, nia sei esforsu atu bele indemniza prejuizu hirak ne'e to'o remata.

Tanba ne'e, nia husu ba tribunál atu bele konsidera nia liberdade kondisionál ne'e, hodi fó oportunidade ba nia atu buka servisu ruma hodi bele selu hikas prejuizu refere. Nia mós deklara katak oras ne'e nia so iha de'it uma ba hela fatin 1 no kareta 1.

Hafoin rona kondenadu nia deklarasaun, tribunál afavor ministériu públiku nia pedidu ne'ebé husu ba tribunál atu bele hetan kondenadu nia dokumentu uma hela fatin no kareta hodi sai nu'udar garantia ba kondenadu nia obrigasaun ba indemnizasaun sivil.

Tribunál decide katak prazu ba kondenadu atu selu indemnizasaun sivil durante tinan 2. Bainhira kondenadu la kumpri ninia obrigasaun, maka garantia ba indemnizasaun sivil sei partense ba estadu.

Kondenadu Antonio Freitas de Araujo nu'udar Diretór Aprovizionamentu ba Ministériu Justisa hetan kondenasaun hosi Tribunál Rekursu iha 12 Dezembru 2012, ho pena prizaun tinan 5 no obrigasaun selu indemnizasaun sivil US\$52.000. Tribunál prova katak nia komete krime administrasaun danoza, hamutuk ho eis Ministra Justisa Luçia Lobato relasiona ho konkursu ba projetu konstrusaun ba edificiu Notariadu iha Distritu 8 (ualu) ba Ministériu Justisa, iha tinan 2008 no tinan 2009. Eis Ministra Justisa ne'ebé hetan kondenasaun hamutuk kondenadu Antonio Freitas de Araújo, simu tiha ona indultu hosi Prezidente Republika, iha selebrasaun aniversariu Referendum, lora 30 Agostu 2014.

Julgamentu ba kazu ne'e prezide hosi Dr. Jose Maria no ministériu públiku representa hosi Dra. Angelina Saldanha. Entretantu kondenadu representa hosi defensor públiku, Dr. Cancio Xavier.

Atu hetan informasaun kompleitu, favor kontaktu:

Casimiro dos Santos

Diretór Interino JSMP

Diresaun e-mail: santos.cas76@gmail.com

Telefone: 3323883/77257466